

# **KAWIN *kok* SUSAH**

*(Naskah Basa Jawa)*



**Karya**

**Joko Yuliyanto**

## KAWIN *kok* SUSAH

Karya Joko Yuliyanto

### NASKAH BASA JAWA

*Nyritakno ribete adat jawa babagan kawin. Seko arah perjodhohan, anak nomer piro, lair bulan opo, nganti tanggal nikah sing kudu disekseni karo sing mangku adat. Tradisi jawa sing isih kenthel ana ing dusun Kliwonan, sakliyane babagan nikah isih ana adat kelairan, sedo, nganti tekan bedal desa nganggo piranti sesajen sak pranatane.*

*Sanadyan wes padha jejeg anggone nyandang agama nanging isih manteb nggunakne tradisi jawa. Minurut carita para sepuh, iku amarga ing jaman semana agama islam diajarne ing tanah jawa saking Walisanga kanthi alus ora ngrusak tradisi leluhur. Mula akeh wong jawa sing minat mlebu islam sing isih njawani. Akeh ajaran wali sing isih trep karo adat jawa, terus alon-alon dileboni ajaran islam kanthi telaten. Ananging dadi akeh perdebatan ing kalangan islam nganti tekan jaman android niki.*

*Naskah iki bakal bedah masalah adat kawin kejawen. Akeh anak sing susah entuk jodho merga ora sesuai karo syariat adat jawa. Wes ora ana cinta maneh, isine mung pasrah karo jodho adat sing pener. Miturut pengalaman para sesepuh, angger-angger enek wong sing nglanggar tradisi adat iku bisa cilaka. Iso nyilakani wong tuwane, suk neng anake, nganti karo sing kawin iku dhewe. Adat jawa, dipercoyo ojo, ora dipercoyo ora keno.*

*Para pemain :*

*Siti (22 tahun) buruh pabrik plastik.*

*Sigit (25 tahun) peternak Sapi.*

*Aziz (27 tahun) teknisi komputer.*

*Heni (26 tahun) buruh pabrik kertas. mbakyune siti*

*Paidi (52 tahun) perangkat desa, bapake siti.*

*Sulastri (45 tahun) bojone paidi.*

*Mbah atmo (71 tahun) sesepuh deso, pemangku adat*

*Umar (26 tahun) ustad, wirausaha, putune mbah atmo*

## ADEGAN 1

*Ing latar wayah wengi Sulastri karo Paidi njereng kloso jogongan mbahas jaman semono isih pacaran. Sinambi ngombe teh anget karo mangan telo godhog. Suworo radio ugo dadi pengiring ing sajroning wengi ditambah remang cahyo rembulan. Ing sisih ngarep latar samping pertigaan ana lampu mercuri sing murup benter dikrubuti laron sing kat mau magrib padha ngumpul. Sulastri nyeraki Paidi sing lagi nglinting rokok.*

**SULASTRI**

Pak, isih eling jaman semono ora pak?

**PAIDI**

Jaman pak Harto? Hlayo isih eling to bu? Negero makmur lan ayem ora kakean demo. Sandang pangan papan yo podho kecukupan. Wes pokoke jaman pak harto ki jos gandos

**SULASTRI**

Mboten niku pak

**PAIDI**

Lha terus? Jaman penjajahan? Yo aku durung lair to bu, lha umurku ae isih 50-an

**SULASTRI**

Boten niku pak

**PAIDI**

Lha opo to bu? Takok kok ra cetho ngono

**SULASTRI**

Lha meh cetho piye? Arep dijelasne malah di senggak terus koyo anggota DPR. Gek nek crito ngalor ngidul re cetho jluntrugane.

**PAIDI**

Yowes, saiki takok opo? Sing jelas

**SULASTRI**

Bapak iku isih eling ora jaman semono dhewe pacaran terus iso bebojoan tekan seprene

**PAIDI**

Oalah bu, bu. Lha mung arep takok koyo ngono ae direwangi godhog telo barang

**SULASTRI**

Halah, lha wong sakbendino yo godhog telo. Coba kebon etan omah ditanduri cery, yo mesti tak gawekne jus

**PAIDI**

Mobil kok di tandur. Wes to bu, bersyukur sanadyan mung duwe motor loro karo onthel siji

**SULASTRI**

Sing tak maksud ki buah cery pak. Ash, embuh pak

**PAIDI**

Halah bu, guyon. Ngono ae lho nesu. Tapi tak sawang sawang nek koe lagi nesu ngono dadi tambah ayu lho bu

**SULASTRI**

Iyo ayu. Neng tuwek. Kisut. Mambu lemah

**PAIDI**

Oalah bu, bu. Lha po aku ki tresno karo koe mergo umur? Mergo rupo? Ora bu, tresnaku ki kawit pertama nyawang sliramu tekan seprene isih utuh. Koe sing isih gemati, sopan lan iso ngurus anak. Wes kui dadi kanikmatan sing kudu luar biasa tak syukuri. Oiyo mau takok opo bu?

**SULASTRI**

Mbuh pak, wes lali

**PAIDI**

Halah, jek nesu ae. Sik sik sik... oiyo, jek eling jaman pacaran opo ora? Hlayo genah isih to bu. Aku ki jatuh cinta saumur urip mung sepisan tok bu. Yo kui karo koe. Mosok yo lali. Wes rasah mbesengut ngono ndak diparani isrofil ngko

**SULASTRI**

Isrofil untumu kui. Lha bapak ki nek ditakoni kok mesti jawabane nglantur. Takok opo jawabe opo. Marai ra nafsu mangan telo ae. Eh, pak tapi jaman semono kan awal e yo mung tresno-tresnonan to pak? Kok yo iso tekan bebojoan ya?

**PAIDI**

Ngene lho garwaku sing pualing ayu dhewe sak ndonyo akherat. Bejane dhewe, padha tresnane tur yo jodho karo adat e. Ndelalahe wetonmu yo rebo legi. Pas karo aku

**SULASTRI**

Oalah, jebul bapak bebojoan karo aku mergo wetonku rebo legi, ora mergo tresno.

**PAIDI**

Lha kok koe dadi sensi men to bu? Opo lagi abangan?

**SULASTRI**

Wes ora abang meneh, ki wes dadi ireng

**PAIDI**

Walah kok malah metu oli. Ngene lho bu, dhewe kan urip neng deso sing kudu nurut karo adat. Dhewe ki duwe leluhur sing kudu dijogo opo sing dadi kebiasaan jaman biyen. Lha nek masalah tresno, aku ki kat awal mung tresnone karo ibu. Lha mbok sumpah. Mungkin mergo Gustiallah paham yen aku karo ibu kui pancen seneng temenan dadi yo sekalian dipasne karo adat e dhewe.

**SULASTRI**

Rasah sok romantis ngono pak. Biyen jek enom genah yo isih sregep nggodani Sri. Sajak mlipir pamit pengajian barang

**PAIDI**

Sri sopo meneh?

**SULASTRI**

Sri Sumarni pak, sing sasi wingi bar dadi rondo. Bojone genah sedo ditabrak truk

**PAIDI**

Oalah Sri Sumarni, lha biyen Sri dhisik kok bu sing nggoda. Aku menghargai yo nek dijawab melu njawil. Wong jowo kan kudu njawani to bu

**SULASTRI**

Alesananmu pak, pak! Eh, tapi Sri kae bar ngrabekne anake malah bojone mati ya pak?

**PAIDI**

Genah kui bu. Mesti ra njaluk saran karo sing mangku adat, nek ra yo ra percoyo adat. Dadi langsung gas dirabi ae. Nglanggar adat yo kudu siap ilang nyowo bu. Mula anake dhewe suk yo kudu manut karo adat nek arep bebojoan. Ben iso sangidah, wangadah, waromah.

Oalah jebul saiki Sri wes dadi rondo to...

**BLACK OUT**

*Heni karo Siti jagongan ana njero omah ngedep TV. Siti sing jek dolanan handphone lagi bungah chatingan karo Sigit. Sing Heni lagi ngemil rambak karo nonton acara berita-berita nasional.*

**HENI**

Ngguya-ngguyu dhewe ki ngopo to ti?

**SITI**

Wih, mbak Heni ki kepo

**HENI**

Mesti lagi bbm-an karo Sigit Sigit kui to? Wes to ti, ngaku wae. Rasah sok rahasia-rahasiaan. Aku paham rasane wong sing lagi kasmaran. Opo meneh adhiku dhewe. Tapi ati-ati lho ti

**SITI**

Lha kok ati-ati kenopo mbak? Mbak ora setuju aku karo Sigit?

**HENI**

Yo ati-ati wae ngko ndak loro ati koyo mbakmu iki. Lha Sigit ki wonge sing ndi to ti?

**SITI**

Ya allah mbak, kat mau ngomong sigat sigit jebul ra ngerti bocahe. Kae lho mbak, sing dhuwur mancung putih rapi wangi koyo superpel

**HENI**

Wes wes wes, kabeh mbok sebut. Yo aku lali to ti, lha koe bola-bali nggowo lanangan neng omah. Tak pikir kabeh yo kancamu

**SITI**

Iyo liane kancaku mbak, tapi khusus Sigit iku spesial neng atiku

**HENI**

Special? Kui pacar opo nasi goreng?

*Banjur bocah loro padha geguyonan.*

**SITI**

Eh, mbak, mbak. Kok biyen mbak Heni rasido rabi karo mas Rudi ki ngopo mbak?

**HENI**

Ra cocok

**SITI**

Ra cocok piye mbak? Mas Rudi ki yo lumayan lho mbak dijak njagong, tumpakane yo pixen. Paribasan ora ngisin-ngisini lah. Pancen sih batuke rodo kroak sitik

**HENI**

Lambemu kui ti, aku ki golek bojo ora mergo rupane opo kahanan uripe. Sing penting pas, klik karo aku ngono wae wes cukup ti.

**SITI**

Lha emang ora klik mbak?

**HENI**

Yo jane lumayan klik. Tapi bapak ora setuju arep piye maneh?

**SITI**

Weleh, lha sing meh rabi mbak Heni kok sing ra setuju bapak. Bapak ki cen nragas tenan kok. Lha kok Bapak ora setuju ki ngopo mbak? Wedi kalah bagus mungkin po ya

**HENI**

Mergo omahe Rudi daerah wetan serong ngalor. Daerah magetan kono ti

**SITI**

Lha kok iso ngono mbak?

*Bapak karo ibu mlebu omah ngampiri Heni karo Siti sing lagi jagongan*

**SULASTRI**

Hayo, dho ngopo iki? Hen, tulung jipukno gorengan neng lemari kae, dipangan bareng-bareng kene. Ki enek telo godhog. Disambi nonton tipi lak wangun

**SITI**

Mbak aku dijipukne wedang sekalian

**PAIDI**

Hush, adi kok ngakon mbake

*Heni mlebu dapur gawe wedang karo jipuk gorengan.*

**SULASTRI**

Misal Ari neng omah lak tambah rame yo? Ealah, duwe anak lanang siji ae ndadak longo adoh men.

## PAIDI

Yowes ben to, lanang ki yo kudu ngomburo neng ngendi-ngendi. Golek pengalaman sing akeh. Manuk ora bakal lali karo susuhe

## SITI

Mas Ari kok ra ndang rabi-rabi pak? Bukane wes duwe duit akeh?

## PAIDI

Mbuh ti, ngko nek wes ketemu jodhone lak yo teko neng omah nggowo calone

## SULASTRI

Mulo nyambut gawe sing sregep, ben sugih koyo masmu kae. Lha kowe kui esuk awan bengi kok mung nyekel Hape ae. Jane dolanan opo to?

## SITI

Usaha golek mantu nggo koe mbok. Eh, kok bapak ra setuju mas Rudi rabi karo mbak Heni ngopo pak?

## BLACK OUT

### ADEGAN 2

*Sore. Ing njero omah, Siti nyritakno hubungane karo Sigit.*

## SITI

Dadi critane ngene, biyen jaman SMP aku dibribik karo kakak kelasku, jenenge Sigit Sukmawan. Aku kelas 2, bocahe kelas 3. Mbendino sms mung nakokne kabarku, ngelingne mangan, ngelingne turu, ngelingne sholat, nganti ngising wae yo dielingne. Jenenge wae yo bocah lagi kasmaran. Yo terus 3 sasi cerak dhekne nembak, yowes to tak tompo, lhawong aku yo nyimpen roso.

Aku jek eling biyen jaman pacaran pancen alay tenan kok. Nek arep turu ngono disms “Bebh, akyu bobox duyu ea. Amu uga gih. Jangan upa mimpiin akyu ea”. Buset sakmben wengi sms koyo ngono. Yen esuk yo sms maneh “Bebh, cholat duyu. Abis tu mandi” yowes to tak bales “iya bebh, ni ge mandi sambil sing song” lha wong aku jaman semono yo jek alay. Wes pokohe nek eling jaman semono marai gilo dhewe.

Lulus SMP, aku karo Sigit pisah, dhekene kon sekolah neng Suroboyo. Lha aku dikon bapak sekolah sing cerak wae. Mergo suwe ra ketemu, pacaran isine mung padu terus. Enek wae sing dinggo alesan, jare selingkuh, wes ra perhatian, nganti lali ngelingne mangan iso dadi padudon. Biasalah jek labil. Setaun hubungan mung padu wae aku pedot karo Sigit. Barkui aku ngroso kesepian. Nek kadang Sigit SMS ngono meh tak bales gengsi, padahal asline yo pengen bales. Sakjane bola-bali aku iki dibribik lanangan liyo tapi tak tolaki terus. Yo, Efek durung iso Mup On.



Nah lulus SMA, Sigit balik maneh. Dikon bapake neruske ternak sapi neng omahe. Mungkin Gustiallah paham nek jodho ki yo ra bakal neng endi-endi. Dino minggu tiba-tiba Sigit sms aku, nakoki kabar. Yo genah to langsung tak jawab. Barkui ngejak ketemuan, terus kita balikan deh.

Yo mugo mugo aku karo Sigit biso ....

*Seko dapur, Sulastri nyeluk siti.*

**SULASTRI**

Ti, digoleki kancamu kae neng ngarep omah

**SITI**

Sopo mbok?

**SULASTRI**

Mbuh, Silit po sopo ngono mau

**SITI**

Silit? Silit? Silit sopo ya? Oalah Sigit..

*Siti budal neng ruang tamu ketemu Sigit*

**SITI**

Eeee, sayangku, cintaku, belahan jiwaku

**SIGIT**

Wes mulai edan meneh. Bapakmu nengndi yang?

**SITI**

Jek neng sawah paling. Wes lingguh sik, tak gawekne wedang. Pengen wedang opo? Kopi rasa rindu, susu kasih sayang opo sirup meminta rabi?

**SIGIT**

Wedang teh wae, rasah repot-repot

**SITI**

Oke siap, calon suamiku

*Siti banjur mlebu omah gawe wedang. Paidi balik seko sawah. Sigit gage ngambung tangane*

**PAIDI**

Kancane Heni mas?

**SIGIT**

Boten pak, rencange Siti. Niki wau namung mampir, kadose ajeng jawah

**PAIDI**

Oalah, yowes lingguh sik. Lha Siti nengndi?

**SIGIT**

Nembe ndamel teh wau pak

**PAIDI**

Kancane kerjo siti?

**SIGIT**

Boten pak, nggih namung rencang dolan mawon.

**SITI**

Eh, bapak wes balik. Pak niki Sigit, calon mantune bapak.

**PAIDI**

Walah mbak Heni wae durung nemu kok wes monta-mantu.

**SITI**

Yo, minimal wes ngeki kode sik lah pak. Mbak Heni kae mbok digolekne sak-sake ngono pak, marai aku raiso rabi wae. Jare ora entuk nglangkahi mbakyune

**PAIDI**

Golek bojo kok sak-sake, koyo golek rongsokan wae. Lha emang wes dho siap rabi?

**SIGIT**

Nggih, Insyaalloh pak. Tapi niki tesih nyelengi rumiyin. Kersane mangke radi gampil anggene seserahan.

**PAIDI**

Nah, yo apik kui. Bijaksana. Lha mas Sigit griyane pundi?

**SITI**

Matesih pak, cerak omahe pakdhe Sanusi

**PAIDI**

Oalah, anak nomer piro mas?

**SIGIT**

Kulo ragil pak, rayi kulo enten tigo

**BAPAK**

Ha? Ragil? Waduh, yowes bapak tak adus sik

*Bapak banjur mlebu omah*

**SITI**

Yang, dolan nandi ngono yo, bosen ki kat mau neng omah.

**SIGIT**

Lha meh dolan nandi? Neng flai oper gelem? Opo neng kuburan sing sepi?

*Sulastri teko nggowo kacang godhog.*

**SULASTRI**

Niki mas, disambi riyin? Ngapunten mboten gadhah nopo-nopo

**SIGIT**

Walah bu, malah ngrepoti.

**SITI**

Piye to mbok? Arep metu malah digawakne kacang. Yowes diwadahi plastik wae, ngko ben digowo balik Sigit.

**SULASTRI**

Oalah, yowes, ati-ati ya. Mengko tak bungkusne

**SIGIT**

Nggih Bu, Assalamu'alaikum

**SULASTRI**

Wa'alaikumsalam

**PAIDI**

Lhah, dho nandi mau bu?

**SULASTRI**

Pacaran pak, mbuh meh nandi mau

**PAIDI**

Anu e bu, jebul Sigit kui anak ragil.

**SULASTRI**

Lha ngopo to pak? Kepentok adat maneh?

**PAIDI**

Lhaiyo to bu, kui pantangan, “Jilu” anak nomer siji ora entuk rabi karo anak nomer telu.

**SULASTRI**

Oalah, adat ki kok yo angel tenan to. Wingi Heni rasido rabi mergo kahanan arah omah sing ra matuk. Lha bareng saiki Siti malah kepentok jilu.

**PAIDI**

Yo ngono iku bu, tradisi leluhur sing kudu dilestarikne, ben ngko nek bebojoan iso tentrem ayem. Koyo awakedhewe ngene iki lho bu

**SULASTRI**

Lha emang nek dilanggar ngono keno opo to pak?

**PAIDI**

Nek nglanggar adat mau bisa ngendegne olehe rejeki, ora biso langgeng. Sing luwih parah iso nyilakani wong tuo loro, mbuh seko sing wedok opo seko sing lanang. Lha kasus’e Sri kan yo koyo ngono iku to bu

*Heni karo Aziz bibar dolan. Nggowo molen dinggo bapak karo ibu Heni*

**AZIZ**

Assalamu’alaikum

**SULASTRI**

Waalaikumsalam...Walah, dho seko ngendi ki mau?

**HENI**

Seko tawangmangu mbok, ki ditumbasne molen

**SULASTRI**

Nah malah repot-repot to

**PAIDI**

Monggo mas, lunggih dhisik

**AZIZ**

Nggih pak. Matursuwun

*Ibu karo heni banjur mlebu omah, nyangking wedang sisane Siti karo Sigit.*

**PAIDI**

Namine sinten mas?

**AZIZ**

Aziz pak,

**PAIDI**

Pacare Heni?

**AZIZ**

Namung rencang pak, mangke menawi cocok nggih nyuwun pangestune mawon

**PAIDI**

Oiyo mesti, tak dongane terus. Lha wong Heni yowes wancine rabi. Kanca-kancane wes momong anak, Heni kae malah jek golak-golek wae. Lha smas Aziz nyambut gawe nengndi?

**AZIZ**

Kulo teknisi komputer pak. Niku nggih kantore mase piyambak

**PAIDI**

Oalah, putra nomer pinten?

**AZIZ**

Kulo putra nomer tigo, rayi kulo setunggal pak.

**PAIDI**

Ha? Nomer telu? Oalah, Nasib, nasib

**AZIZ**

Lha pripun pak?

**PAIDI**

Yowes tak tinggal sik ya. Manukku durung tak pakani kae

**HENI**

Lhoh pak arep nandi? Tak gawekne wedang malah lungo. Niki mas diunjuk sik

**AZIZ**

Matursuwun ya Hen

**BLACK OUT**

### **ADEGAN 3**

*Esuk. Mbah Atmo sender ono lincak ngarep omahe. ngligo karo nembang “dadi ati”. Nyawang wong padha sliweran tandur, kulakan neng pasar, bocah-bocah padha sekolah. Neng ngarepe ana kopi karo udud lintingan.*

**MBAH ATMO**

Gegarane wong akrami  
Dudu bondho dudu rupo  
Hamung ati pawitane  
Luput pisan keno pisan  
Yen gampang luwih gampang  
Yen angel angel kelangkung  
Tan keno tinumbas arto

**PAIDI**

Kulonuwun,

**MBAH ATMO**

Monggo, ngopo di?

**PAIDI**

Namung ajeng silaturahmi mbah. Piyambakan mbah?

**MBAH ATMO**

Yo, nek lagi nglaras ngene iki di, liyer-liyer ngrasakne suworo angin, bagindo leyo panguoso daratan lagi padha bungah, bagindo kele panguoso laut lagi padha sumringah

**UMAR**

Mbah, tak budal rumiyin nggih?

**MBAH ATMO**

Walah lagi jam piro to mar? Kok mruput men? Ki pakdhe Paidi gawekno wedang sik

**UMAR**

Nggih mbah, Mbah Atmo ngunjuk nopo, kula damelne sekalian

**MBAH ATMO**

Aku rasah, kopi sing mbok gawekne kat mau subuh jek mantep iki

**PAIDI**

Niku sinten mbah? Kok jarang ketingal?

**MBAH ATMO**

Putuku di, putrane Parmin. Lagi limang dino neng kene. Jare meh urip neng dusun wae, hawane suweger. Ngopo di? Pengen mbok pek mantu po piye?

**PAIDI**

Walah, mbah Atmo ki gae-gae wae.

**MBAH ATMO**

Lha piye? Heni karo Siti lak jek dho perawan to? Mbok dirabekne karo Umar kui wae? Opo jek kurang bagus?

**PAIDI**

Ooo, jenenge Umar to mbah. Mboten ngoten mbah. Nek masalah jodho kula pasrahne Gustiallah mawon

**MBAH ATMO**

Tapi wong tuwane lak yo kudu ikhtiar to? Pasrah terus dadi perawan tuwo ngko

**PAIDI**

Kulo teng mriki niki nggih ajeng mbahas niku mbah, perjodhoan.

**MBAH ATMO**

Lha piye? Meh takok opo?

**UMAR**

Niki mbah, dhe, unjukanipun? Kula budal rumiyin nggih

**PAIDI**

Nggih mas, ngatos ngatos. Mugi lancar anggene nyambut damel

**MBAH ATMO**

Kui didongani calon morotuo

**PAIDI**

Walah, mbah Atmo ki senengane gojekan wae

**MBAH ATMO**

Piye mau? Arep takon opo?

**PAIDI**

Ngeten mbah, anakku wedok loro niko dho pengen rabi. Lha wingi niku sampun dho dolan teng griyo

**MBAH ATMO**

Nembung?

**PAIDI**

Mboten mbah, nggih namung dikenalke riyen. Nanging ngoten mbah. Siti niku pengen nikah kalih Sigit, bocahe ragil. Niku miturut adat lak mboten prayogi to mbah?

**MBAH ATMO**

Lha yo genah ra entuk to di. Opo siap kowe karo Lastri nanggung bencanane sukmben? Iso utang nyowo kowe di. Ojo entuk

**PAIDI**

Lha kula kedah priipun mbah?

**MBAH ATMO**

Yo pokoke ojo entuk. Lha mbok ben Siti karo Umar kui wae. Sandang pangan papan lak genah iso kecukupan.

**PAIDI**

Nanging kula ajeng ngomong mboten kepenak kalih Siti niku mbah?



## **MBAH ATMO**

Yo kui terserah kowe di, nek aku nyaranke rasah. Mending karo Umar. Bocahe isih lajang, pinter ngaji, sregep, sopan karo wong tuwo.

## **PAIDI**

Lha nopo Umar purun rabi kalih Siti mbah?

## **MBAH ATMO**

Genah gelem lah di. Umar ki bocahe manut karo wong tuwo. Lha nek Heni kae kepiye? Wes entuk calon?

## **PAIDI**

Niku kasuse nggih sami kalih Siti mbah, ndekwingi niko ngejak rencange, bocahe putra nomer telu. Lha niku lak Jilu malih mbah

## **MBAH ATMO**

Walah lhakok mesakne men to Heni kae, wingi rasido rabi mergo papane ra pas, saiki genti kepentok jilu. Gek wes tuwo ngono dadi prawan. Heni kae yo ndang dirabekne wae, karo Pendi kae opo ora gelem?

## **PAIDI**

Nek kula sih mbeten menopo mbah, lha Heni niko nek dijodhone malah ngamuk ra nggenah ngoten mbah. Jare tresno niku mboten paring dipekso. Niki pun boten jaman siti nurbaya malih, ngotene mbah

## **MBAH ATMO**

Yowes sing sabar di, penting ikhtiar terus. Ngko nek wancine lak yo diparingi karo Gustialah. Heni kui wetone rebo legi to di?

## **PAIDI**

Nggih niku mbah. pripun?

## **MBAH ATMO**

Ngko cobo pas wetone belehno pitik pitu, karo gawe sesajen nggo mbahmu pawiro, ben digampangne olehe entuk jodho

## **PAIDI**

Nggih mbah

## **BLACK OUT**

## ADEGAN 4

*Sore. Neng ruang tamu, Paidi karo Sulastri padha rembugan babagan perjodhoan putrane. Sulastri nyiapne minyak jlantah dinggo ngeroki gegere Paidi sing lagi gembreges.*

### SULASTRI

Wes to pak rausah dipeker nemen-nemen. Kebiasaan, nek kakean pikiran kok mesti masuk angin. Heni karo Siti ki wes gedhe, ngko lak yo mudheng dhewe

### PAIDI

Ra kepikiran piye to bu, arep turu wae angel eram. Ndek mau mbah Atmo yo malah nyarani kon jodhone putune karo Siti. Ngko nek aku ngomong ra setuju karo bocah loro kae ndah dadi rame tenan. Kan kowe yo mudheng dhewe to bu, bocah-bocah ki nek duwe kepinginan kudu dituruti. Ealah, gawean neng kelurahan wes numpuk, sawah dipangani tikus, iki ditambah bocah-bocah sing padha kesusu kawin

### SULASTRI

Yowes ndang diomongi wae pak, ben ndang lego. Urip neng deso ki yo kudu siap koyo ngene. Anak sing rabi wong tuwo sing mumet.

### PAIDI

Aduh, ojo miring-miring keno balung. Ngeroki kok ra aturan ngono. Kui nggowo duit opo lading, kok rasane perih men.

### SULASTRI

Ealah pak, wes dikeroki jek sambat wae. Nek dikeroki ki yo mesti loro, nek pengen penak yo pijek kono. Njaluk mari kok nggersulo wae. Lagi entuk telung garis wes sambat

### PAIDI

Wong wedok ki ramudheng larane sing dirasakne wong lanang. Cobo, koe tak keroki genti.

### SULASTRI

Yo, ojo neng kene to pak. Mosok suwargomu arep mbok umbar neng wong akeh. Nggonaku iki yo mung duwekmu. Wong liyo ojo nganti reti.

### PAIDI

Oiyo ding bu, jebul jek enek wong akeh.

### SITI

Assalamualaikum

**SULASTRI**

Waalaikumsalam, Eh Siti karo dek Sigit bar seko ngendi

**PAIDI**

Sik bu, tak turu sik

*Paidi gage lungo mlebu kamar. Ra sempet salaman karo sigit*

**SIGIT**

Bapak nembe gerah to bu?

**SULASTRI**

Iyo dik, biasa nek kakaeen utang yo langsung lungkrah

**SITI**

Paling dicokot tikus neng sawah. Terus keno infeksi virus FLU TIKUS. Lha mbak Heni nengndi Bu?

**SULASTRI**

Mbuh mau, jare pamite arep joging neng SDIT ngono

**SITI**

Paling joging karo PDTK mbok. Wes yang lungguh sik. Mbok ra enek gorengan opo cemilan ngono to? Gulone mau awan yo entek ki

**SULASTRI**

Kae neng lemari enek roti kering, gulane mau yo wes tuku. Gage digawekne kono.

*Siti banjur mlebu gawe wedang. Aziz karo Heni teko.*

**AZIZ**

Assalamu'alikum

**HENI**

E, enek tamu. Pacare siti to mas? Opo kancane? Siti ki pancen jos tenan og, wingi gowo sopo saiki nggowo sopo. Gonta ganti terus

**SITI** (*seko njero*)

Lambemu mbak

**HENI**

Weh, krungu jebule. Yowes tak tinggal neng jero sik ya. Kowe lingguh sik kono karo calon adhi ipar. Bu, lha bapak nengndi?

**SULASTRI**

Kae neng kamar. Masuk angin

**HENI**

Wah, bapak ki setronge nek bengi tok. Awan loyo

**SULASTRI**

Dho seko ngendi iki mau?

**AZIZ**

Wau kula ajak Heni kenalne Bapak Ibu kula bu

**SIGIT**

Nek kula wau saking ...

*Siti metu gowo wedang karo roti kering.*

**SITI**

Saking moool mbok, sing isine cah enom kinyis kinyis. Pupurane medok koyo bayi pitung ndino. Sandangane seksi koyo ra ketok nek nyandang. Hawane adhem. Ra cocok nggo bapak, genah langsung masuk angin

**SULASTRI**

Halah, bocah kok nrocos wae. Yowes dimanggakne. Tak tinggal masak dhisik

**SITI**

Mbok, nek masak uyahe rodo akeh. Tambah asin tambah sedep

*Ibu lungo menyang dapur. Heni teko gowo buku tulis karo pulpen*

**SITI**

Weh, nggo ngopo kui mbak. Anu to, daftar utangmu?

**HENI**

Hush, iki aku arep nulis daftar undangan nggo nikahanku suk. Kowe kui mung ngintil ae ra ndang niat rabi

**SIGIT**

Nggih, jane wes enek niatan mbak. Tapi Siti kui jek durung siap momong anak

**SITI**

Aku siap ko yang, sing penting ra kakean nangis wae

**AZIZ**

Lha, rencana meh gawe undangan piro hen?

**SITI**

Kok hen? Wah ra romantis blas, koyo kita ki lho mbak, manggilnya Sayang, beb, cinta, papa-mama, ayah-bunda ....

**SIGIT**

Yaaaang.... Wah alayne kumat ki

*Bocah papat padha rembugan, diiringi musik lampu soyo peteng nandakne wayah wengi wes teko.*

**BLACK OUT**

## **ADEGAN 5**

*Ing teras omah. Wengi. Paidi karo Umar lagi rundingan babagan agama. Lungguh ing kursi tuwo, wes cemepak teh anget karo kacang. Paidi sarungan ngimbangi sandangane umar sing katon rapi koyo bocah santri.*

**PAIDI**

Oalah, jebul dek Umar tau nyantri neng pondok to?

**UMAR**

Inggih pak, teng pondok Ummul Quro' Boyolali

**PAIDI**

Olah pantes, unggah-ungguhe karo wong tuwo dhuwur. Lha bapakmu kae saiki neng ngendi? Kok ra melu kowe balik mulih?

**UMAR**

Bapak tesih ngajar ngaji teng Boyolali ugi pak, nanging benten kalih pondok nggen kula. Siti niki nembe ten pundi pak?

**PAIDI**

Paling lagi nonton TV nek ra yo wes turu, jare sesuk mlebu rodo esuk ngono

**UMAR**

Oooooo...

**PAIDI**

Lha dek Umar niku asline pripun? Duwe roso karo Siti mboten?

**UMAR**

Nggih sakwajare tiyang kakung pak, mesti nggeh tresno kalih Siti. Lha bocahe niku manis, pinter, gampang srawung karo liyane. Yo, senadyan rodo pecicilan.

**PAIDI**

Lha yo kui, Pecicilan. Keturunan simboke jaman enom yo pecicilan. Tapi atine tetep apik kok dik, yo nek mung nglakoni tanggunjawab dadi bojo mesti genah cocok.

*Sigit teko gowo sepatu.*

**SIGIT**

Assalamualaikum

**UMAR**

Waalaikumsalam

**PAIDI**

Lhoh, ngopo? Wengi-wengi kok mreng?

**SIGIT**

Siti wonten pak?

**PAIDI**

Siti lagi turu

**UMAR**

Monggo mas, lenggah mriki. Kadose asring disawang tiyang sanes. Mboten wangun menawi enten tamu mboten dimanggakne

**SIGIT**

O, nggih. Matursuwun

*Sigit banjur lungguh neng kursi sampinge Umar. Paidi nyusul neng mburine*

**UMAR**

Kersane mas?

**SIGIT**

Iki arep ngekne sepatune Siti, wingi kodanan, terus tak silihi sendalku dhisik

**UMAR**

Onggih, Namine sinten mas?

**SIGIT**

Jenengku Sigit mas. Lha sampeyan?

**PAIDI**

Jenenge Umar, Calone siti

**SIGIT**

Calon? Calon nopo pak?

**PAIDI**

Yo calon bojo, mosok calon presiden. Wes intine aku arep njodohne Siti karo Umar. Aku ra setuju karo kowe. Wes ora duwe unggah-ungguh, penggawean ra jelas, suk siti arep mbok pakani opo?

**SIGIT**

Pak, sing jenenge tresno ki ra mandang bondo opo rupo. Nanging cinta pak,

**PAIDI**

Opo? cinta? Opo sakbendino siti arep mbok pakani cinta? Aku iki perangkat desa, dadi yo kudu pantes yen arep golek mantu. Ora sak-sake. Kudu jelas bibit, bebet, bobote. Wong tuwamu wae dho ora nyambut gawe. Ngisin ngisini nek arep dadi besan

**SIGIT**

Nggihpun pak, yen pancen niku karepe bapak. Matursuwun sampun ngidak martabat kula. mugi calone siti bisa njogo lan gawe bahagia siti. Assalamualaikum

**UMAR**

Waalaikumsalam

**PAIDI**

Ngapunten ya dik, ndadak kudu rame neng ngarepmu

**UMAR**

Niku pacare Siti pak?

**PAIDI**

Yo, lagi seminggungan dikenalne

**UMAR**

Menawi angsal tanglet. Lha kok bapak boten setuju kalih Sigit wau kengeng nopo?

**PAIDI**

Kepentok adat dik, Jilu. Anak nomer siji ora entuk rabi karo anak nomer telu. Ndek mau aku muring-muring babagan bondo, bibit, bebet, bobot asline yo mung nggo alesan ben tetep ora nglanggar adat

**UMAR**

Astaghfirullah pak, jaman ngeten tesih percoyo adat? Ngoten niku mboten angsal pak. Musyrik. Ngapunten nggih menawi kula kesane radi nggurui. Nanging dados tiyang muslim niku kedah percoyo kalih kersane Allah SWT. Mboten malah percoyo kalih adat ngoten niku.

**PAIDI**

Tapi dhewe yo kudu ngurmati tradisi leluhur dik, lhawong kui wes turun temurun seko simbah buyut. Misal adat kui dilanggar bisa cilaka. Para wali biyen nekakne islam kui yo lewat adat sik, ben iso ditompo masyarakat. Ora langsung des ngono dik

**UMAR**

Nggih niku lak sarananipun pak, nanging tujuane nggih ngresiki adat kados islam kang bener saking Allah lan Rasulullah.

**PAIDI**

Yo sing pas kui agama trep karo adate. Lha wingi aku pas dolan neng omahmu kui yo mbahas iki. Simbahmu manti-manti ojo nganti Siti rabi karo Sigit. Nyaranke kon rabi karo kowe. Ben Siti iso dibimbing agama karo akidahe

**UMAR**

Nggih menawi ngoten, kula manut panjenengan mawon pak. Kersane sami-sami saged dipun tampi kanthi legowo lan sae

**BLACK OUT**



## ADEGAN 6

*Wayah wengi ing njero omah. Siti karo Heni jagongan karo nonton TV.*

**HENI**

Wes telung dino iki kok Sigit ra tau mreng to ti? Lagi padu to?

**SITI**

Ora mbak, Dhekne lagi ngurus bapake. Jare neng rumah sakit loro liper.

**HENI**

Lha kok kowe ra tilik? Wah kowe ki pasangan opo? Ora sehidup semati ngono. Nek pasangane enek masalah yo dihibur, dikancanai, sediakan bahu untuknya.

**SITI**

Lha aku meh tilik jek wedi mbak, ngko nek ditakoni babagan rabi, aku durung iso jawab. Ngko tak jawab durung ngono malah bapake Sigit sekarat terus mati piye? Mlebu penjoro aku. Wong guru njiwit anak wae yo iso mlebu penjoro, opo meneh gawe mati uwong.

**HENI**

Cangkemmu kui ti, nek ngomong waton njeplak wae. Yowes tak metu sik, ngko nek ditakoni bapak opo simbok lagi hang out ngono

*Heni nyangking tas njuk budal.*

**SITI**

Ealah, acara tipi kok isine ra ceto kabeh. Acara dangdut malah dho tangisan, acara komedi malah koyo cah cilik dolanan mobil-mobilan, sinetron dho lebay, berita isine mung ngrasani tok. Golek acara koyo jaman cilik wes raono. Acara tipi saiki ra mendidik blas. Tapi rodo salut sih. Tipi saiki dadi syaria kabeh, delo-delo disensor. Pilem corek wae disensor, ngko paling enek wong lanang ngligo yo melu disensor.

**SULASTRI**

Ti, mbakmu mau nengndi?

**SITI**

Hang out mbok

**SULASTRI**

Hang out kui opo?

**SITI**

Arisan

**SULASTRI**

Oalah arisan to. Mangan telo wae sok ngomong inggris

**SITI**

Mula biyen ki sekolah sing dhuwur mbok, ben pinter. Lha kowe lulus SMP wes selak dijodhone wae mbok

**SULASTRI**

Ealah ti, mending rasekolah tapi tatakramane dhuwur. Ra koyo bocah saiki. Sekolah dhuwur-dhuwur kelakwane ra ditata. Akeh maksiat, padudon, kae deloken neng tipi cah kuliah malah dho dema-demo ra nggenah ngono.

**SITI**

Ngono kui jenenge menyampaikan apresiasi mbok. Pemuda itu tonggak kemajuan bangsa

**SULASTRI**

Preketek, pemuda nggo kemajuan jaman ki sing berprestasi. Ora njuk bengak-bengok neng tengah dalan. Marai macet, ngrusak opo-opo. Paling yo mung ben dho mlebu tipi.

*Paidi mlebu omah gowo bancaan dideleh neng sampinge Sulastri, langsung mlebu kamar*

**PAIDI**

Lha Heni neng ngendi bu?

**SULASTRI**

JENG LOT pak

**SITI**

Kok jeng lot to mbok? Hang out!!

**SULASTRI**

Ashmbuh..

*Siti entuk telfon seko Sigit, banjur jingkrak ngadeg ngagkat telfon*

**SITI**

Assalamualaikum. Piye yang? Bapak wes sehat? Ha? Terus? Opo? Lha kok kowe ra ngomong karo aku kat biyen to yang? Yowes, ngko ketemu sik wae. Halo? Halo? Yang?

Paaakkk... bapaaaak....

**SULASTRI**

Ngopo to ti? Bengak-bengok mbrebegi tonggo

**SITI**

Paaaakk....

**PAIDI**

Ngopo to ti? Arep turu malah bengak-bengok

**SITI**

Pak, aku ki kurang bekti opo karo kowe? Ora entuk kuliah, tak turuti. Ra mbok tukone motor, aku trimo. Yen esuk kadang tak masakne, sore tak rewangi neng sawah. Saiki aku arep rabi karo Sigit wae mbok larang. Opo aku arep mbok dadekne koyo mbak Heni, perawan tuwo

**SULASTRI**

Wes to ti, rasah nesu-nesu ngono

**SITI**

Halah, kowe kui yo padha wae mbok. Mung mikir bondo tok. Aku mudheng yen kowe kowe kui arep njodohne aku karo umar, putune mbah Atmo. Wong paling kaje neng ndeso. Aku ra nyongko pak, kesenangan anakmu mbok gadekne karo kaje neng uripmu.

**SULASTRI**

Sing ngomong koyo ngono kui sopo ti?

**SITI**

Aku wes mudheng kabeh mbok, mula saiki Sigit ra tau dolan mreng yo mergo ulahe bapak kui ngisin-ngisin sigit neng ngarepe umar.

**PAIDI**

Siti! Anak kurang ajar, wani karo wong tuwo. Pantès wae aku rasido ngrabekne karo sigit. Mergo bocahe raiso ndidik kowe.

**SITI**

Aku koyo ngene ora mergo Sigit pak, tapi mergo kelakuanmu sing ra ngajeni wong liyo.

**PAIDI**

Siti! Ngertio aku ra ngrestui kowe karo sigit kui mergo ora cocok karo adat. Kowe kui anak nomer telu. Sigit anak mbarep. Ora mungkin kowe nikah, bisa nyilakani wongtuwo.

## **SITI**

Yowes pak yen pancene bapak isih ngenut adat sing ra mesti genahe kui. Aku tak minggat.

*Paidi karo Sulastri freeze. Siti monolog*

## **SITI**

Opo ngene iki sing diarani takdir? Urip neng ndeso, ngurus rabi kudu nganggo restu adat. Kancaku akeh sing wes dho rabi ra nggagas sing koyo mengkono kui. Jare ngendeg rezeki, ora iso urip bebrayan, nganti ketekan pati. Ealah, Gusti kok yo disaingi karo aturan dhewe. Wediku iki mung aturan wong jaman biyen sing wes kadung njodhone anake karo wong liyo, alesan adat ben ora iso rabi karo sing ditresnani. Wes yen pencen pinesti koyo mengkono aku arep minggat. Goleki tresnaku sing temenanan ora nurut wong tuwo sing mung mikir kahanane dhewe. Ora urus diarani anak durhaka

*Siti banjur mlebu nyepakno sandangan sing diwadahi ono tas gedhe. Siti metu seko omah karo ngempet nangis. Paidi karo Sulastri isih freeze nganti siti wes ora ketok seko omah maneh. Paidi gemugrah bingung karo muring-muring. Sulasri bengak-bengok karo goleki Hape dinggo hubungi Ari sing ono Kalimantan.*

## **PAIDI**

Bocah durhaka. Wani karo wong tuwo. Ra duwe tata krama. Marai muring tok. Kelakuan ora karuan genahe.

## **SULASTRI**

Hallo, ri, ari. Hallo. Halloo. Iki piye meneh duh Gusti. Pak Ari, ora keno dihubungni pak. Hen, hen... oalah Heni ki mau yo metu nengndi

## **PAIDI**

Yowes bu, ben minggat sing adoh sisan. Aku ra pateken yen mung kelangan anak siji sing ra nggugu gunumane wong tuwane.

## **SULASTRI**

Pak, siti mengko arep mangan opo pak? Bocahe arep turu ngendi? Gek iki yo lagi wayah udan. Ayo pak digoleki dhisik, sopo reti dhekne mlayu neng gone kancane. Pak, kowe ojo meneng wae. Kae motore ndang ditokne.

## **PAIDI**

Wes to bu, rasah kemriyik. Kupingku risi ngrungokne cangkemmu sing ra cetho kui.

## **SULASTRI**

Yowes pak, yen pancen kowe ra gelem nggolkei siti, tak golekane dhewe. aku tak yo sisan melu minggat.

**PAIDI**

Iyo bu, iyo bu. Ojo ngono to bu. Wes ojo melu minggat ya. Ngko digoleki bareng-bareng

**SULASTRI**

Yo gek ndang pak. Nek perlu telpon polisi, dilebokne koran

**PAIDI**

Iyo bu, tapi iki kan wes wengi. Sesuk wae di goleki bareng-bareng karo Heni. Ngko yo njaluk tulung pak RT kon goleki bareng. Yowes saiki ndang turu sik nggih bu

**SULASTRI**

Tenan lho pak? Sesuk! Pokoke siti kudu ketemu, nganti ra ketemu aku suk yo melu minggat

*Sulastri banjur mlebu kamar karo nangis. Heni mindik-mindik teko*

**HENI**

Enek opo to pak? Kok rame-rame?

**PAIDI**

Seko ngendi wae?

**HENI**

Anu pak, lagi maem mau. Nyobo sego goreng anyar wetan dalan

**PAIDI**

Adhimu minggat

**HENI**

Ha? Tenanan pak? Minggat nengndi? Kok ra digoleki? Kok kowe meneng wae to pak?

**PAIDI**

Kowe kui dikon ngurus Siti malah gur mblayang wae. Yang-yangan alesan mangan. Elingo kowe kui yo ra bakal tak jodhone karo Aziz. Kowe kui anak mbarep ora entuk rabi karo anak nomer telu. Kowe kui padha karo Siti. Duwe anak perawan 2 wae...

**HENI**

Uwes pak! Opo ora cukup bapak nglarani Heni. Biyen karo Rudi ra entuk mergo arah tinarah. Saiki mergo anak mbarep karo nomer telu. Mbok ngomong wae nek aku ora entuk rabi! Saiki Siti melu nanggung karo kepinginanmu sing ngotot karo adat ra cetho kui pak. Nganti kapan? Nganti kapan? Nganti kapan pak? Aku seprono seprene mung riwa riwi takok adat kui kudu di anut ora, seko ustad teko tekan guruku SD tak takoni pak. Kui ki ora entuk. Musrik pak.

Jenenge jodho kui wes enek sing ngatur. Masalah rejeki mengko yo bakal ngalir yen pancene dhewe ikhtiar karo dongo. Ugo kepaten pak, kui kabeh wes diatur GustiAllah

### **PAIDI**

*(ditapok)* bocah kurangajar, rasah sok ngajari wong tuwo. Kowe ki ora bakal mudheng

*Paidi banjur mlebu kamar ninggalno Heni*

### **HENI**

Ora bakal mudheng opo pak? Ora bakal mudheng yen kabeh kui kudu manut kekarepanmu?

### **BLACKOUT**

## **ADEGAN 7**

*Ing tlatar wayah esuk. Srengenge lagi arep njedul seko celahing gunung. Hawa seger trep karo sawah ing pinggir deso. Mbah Atmo nembang jowo “Gagat Enjang” karo ngrungokne radio. Leyeh-leyeh ono ing lincak sinambi ngopi karo udud. Umar dolanan manuk sing lagi wae dituku. Sajak dandan mlipit kokonan bibar mulih seko subuhan.*

### **MBAH ATMO**

Gagat enjang, Wanci bangun pungun-pungun

Trus ngalamun, Ngungun wruh tibaning embun

Kae suryo, Mungup ing tanceping langit

Mrabawani, Jagad kabeh kaweratan

Inggang maweh doyo, Uripe sagung dumadi

Suryo condro kartiko, Amengku doyo

Soyo mantep, Ngenggugayes pane Gusti

Maha asih, Sayekti kang moho suci

### **UMAR**

Mbah, kok kula kepikiran kalih Siti nggih?

### **MBAH ATMO**

Nek pancen tresno ki dioyak. Jodho pancen neng tangane GustiAllah, neng nek ra mbok jipuk yo tetep cementel neng tangane GustiAllah. Siti kui bocahe apik Mar, wes ayu koyo simboke, pinter ngurus omah, wes komplit nek dijak bebojoan.

**UMAR**

Nanging kula ragu mbah, ketingale Siti niki mboten tresno kalih kula

**MBAH ATMO**

Kowe kui opo ora eling pepatah raja keraton jaman semono. “Tresno iku jalaran seko kulina”. Sing penting kawin sik, ngko nek wes sakomah lak dadi tresno. Wes percoyo karo simbahmu

**UMAR**

Nanging siti niko sampun gadhah pacar mbah

**MBAH ATMO**

Sakdurunge Janur kuning durung garing. Iso diembat

**UMAR**

Nanging mbah...

**MBAH ATMO**

Wes ora usah nongang nanging wae. Butuh nek kowe wes siap rabi tak tembungne. Paidi kae jek manut karo aku.

**UMAR**

Nggih mbah

*Paidi karo Sulastri njedul neng omahe Mbah Atmo, arep njaluk tulung goleki Siti*

**PAIDI**

Kulanuwun mbah

**MBAH ATMO**

Lhadalah, lagi wae dirasani langsung njedul. Dhowo tenan umurmu di, piye enek opo? Arep lamaran?

**SULASTRI**

Mbah kula nyuwun tulung mbah

**MBAH ATMO**

Piye enek opo?

**SULASTRI**

Mbah poko ke kula nyuwun tulung

**MBAH ATMO**

Lhayo njaluk tulung opo? Nek kon rabi meneh yo aku wes ra kuat. Loyo

**PAIDI**

Ngeten mbah..

**MBAH ATMO**

Sik di,,, Mar, tulung gawekno wedang.

*Umar gage mlebu omah gawe unjukan*

Wes saiki kowe lungguh dhisik kene sing penak. Disawang wong liwat malah koyo enek suting sinetron. Piye?

**PAIDI**

Siti mabengi minggat seko omah mbah

**MBAH ATMO**

Walah, kok iso? lagi wae arep tak jodhone karo umar. Nek kelakon koyo ngene iso bubar ki rencanaku.

**PAIDI**

Lha nggih niku mbah, siti niku ngeyel pengen rabi karo Sigit.

**SULASTRI**

Wes mbah saiki ndang salin, ayo digoleki bareng. Ngko ceritane neng ndalan wae. Selak siti diculik wong terus dimutilasi mbah

*Mbah Atmo gage mlebu omah njipuk salin. Umar metu gowo unjukan dinggo Paidi karo Sulastri*

**UMAR**

Wonten nopo pak?

**PAIDI**

Siti minggat Mar,

**UMAR**

Lhoh? Kok saget minggat pak? Lha minggat ten pundi?



## **PAIDI**

Nek aku reti minggat nengndi yowes tak parani to Mar, rausah tak goleki. Wes kowe gage salin kono. Ayo bareng bareng goleki Siti

## **UMAR**

Oh nggih Pak, sekedap

*Umar gage mlebu omah nyusul Mbah Atmo salin klambi. Paidi karo Sulastri ngombe wedang sing digowo Umar mau.*

## **SULASTRI**

Pak, ngko nek Siti ora ketemu piye?

## **PAIDI**

Wes to bu. Manuk mabur ora bakal lali susuhe. Mengko tak balik muleh dhewe. Kabeh sedulur wes tak telfon, ngko nek reti Siti tak kon hubungi dhewe

*Heni karo Aziz teko marani Paidi karo Sulastri.*

## **SULASTRI**

Piye Hen? Wes ketemu?

## **HENI**

Durung mbok. Aku mau yo bar seko omahe Sigit. Bocahe ora mudheng Siti ono ngendi.

## **PAIDI**

Olah, bocah kok mung gawe girise wong tuwo tok

*Mbah Atmo karo Umar metu seko omah siap budal nggoleki Siti*

## **MBAH ATMO**

Pie di? Sido goleki Siti ora? Lha iki tambah Heni barang , wes ayo bareng-bareng sisan

## **AZIZ**

Ngapunten pak, bu, mbah. kula boten saged ndampingi. Mangke siyang wonten acara keluarga. Saestu nyuwun ngapunten nggih pak kula ngrumiyini. Assalamualaikum...

## **UMAR, SULASTRI, HENI**

Waalaikumsalam

**HENI**

Ati-ati mas.. mbok aku tak balik gasik ya. Njogo omah sekalian masak.

**SULASTRI**

Yowes Hen, baliko sik. Ngko pokoke nek enek kabar seko Siti. Aku dikabari

**HENI**

Nggih mbok. Monggo mbah

*Heni budal salaman karo Mbah Atmo, Paidi, karo Sulastri*

**MBAH ATMO**

Wes saiki arep nandi sik?

**SULASTRI**

Manut njenengan mawon mbah

**UMAR**

Pripun menawi nyuwun tulung polisi rumiyin?

**PAIDI**

Oiyo lapor polisi sik wae. Kae dibayar negoro gaweane mung tura turu neng ndalan tok. Kon bantu goleki siti wae ben ora mangan gaji buta

**MBAH ATMO**

Oiyo, cocok kui. Yowes ayo mangkat

*Kabeh budal neng kantor Polisi. Lampu feed out. Diiring musik sing kesane lagi padha goleki Siti. Sekirane nunggu musik rampung. Lampu feed in, nandakne nek wes wayah sore.*

**SULASTRI**

Pripun niki mbah?

**MBAH ATMO**

Lha piye? Wes digolek ngalor-ngidul, ngetan-ngulon yo mung gabuk, ora nemu jawaban.

**UMAR**

Nggih pun, ndonga mawon sareng-sareng kadose Siti balik melih bu. Sinambi ngentosi laporan saking pak polisi

## **PAIDI**

Nggih pun mbah, matursuwun sanget sampun dibantu. Kowe yo matur suwun mar, pancen pantes tenan dadi mantuku kowe kui

## **SULASTRI**

Wes to pak rasah mikir monta-mantu. Goro-goro kowe ra setuju Siti rabi, saiki dadi golek

## **PAIDI**

Lha piye to bu, aku ki yo milihne jodho sing pas karo siti. Ben suk nek bebojoan ora keliru, iso bahagia.

## **MBAH ATMO**

Wes rasah dho padu neng kene. Disawang ora patut. Wes surup wancine simbah padha ngangsu kawruh wonten donyo. Wes gek dho balik. Rasah ubet, mengko ndak sing njogo dusun muring.

## **SULASTRI**

Nggih pun mbah. Assalamualaikum

*Sulastri budal ndisiki paidi sing isih salaman. Lampu feed out nganti Paidi ngilang seko omahe mbah Atmo*

## **BLACK OUT**

# **ADEGAN 8**

*Wayah wengi, ing panggon liyo. Sigit, Siti, Aziz karo Heni ngumpul bareng padha gegojekan. Ora ono pengucap namung gestur sing nandakne lagi padha bungah. Sakwetoro lampu peteng maneh. Ing ruang tamu. Sulastri, Paidi, Umar karo Mbah Atmo rundingan.*

## **SULASTRI**

Wes telung ndino iki Siti ora balik mbah, arep mangan opo bocah kae

## **PAIDI**

Ndek mau awan polisi tak parani yo ora ono jawaban.

## **MBAH ATMO**

Halah, polisi kui nek ora ono rokok gratis yo ora bakal mlaku. Wes di, yen pancen Siti ora balik sesuk tak nyebar sesajen neng prapatan ben leluhure dhewe sing goleki.

*Heni karo Sigit teko*

**SIGIT**

Assalamualikum

**PAIDI**

Lhoh? Kok kowe ijek wani mreng maneh? Siti mbok sigahno nengndi?

**SULASTRI**

Hen, kok kowe iso karo Sigit? Lha Aziz nengndi?

**HENI**

Wes to pak, ora usah muring-muring. Iki Siti wes ketemu.

**MBAH ATMO**

Walah, ilmuku durung tak tokne malah wes ketemu

**SIGIT**

Ngapunten pak, kalawingi nika kula boten sopan ten njenengan.

**HENI**

Dadi intine saiki ngene pak, Siti gelem balik omah angger iso nikah karo Sigit. Sekalian adat-adatan iku iso ilang.

**MBAH ATMO**

Ati-ati kowe Hen yen ngomong masalah adat. Biso kuwalat

**PAIDI**

Ora sudi!!

**SULASTRI**

Pak, kowe iki kok wes buntet masalah adat megkono, nganti lali bahagiane Siti. Sing penting Siti balik dhisik pak. Perkoro bebojoan karo adat iso dibahas ono mburi

**PAIDI**

Iki ora mung nyangkut kebahagiaan Siti bu, tapi masalah Pati. Patine dhewe

**UMAR**

Astaghfirullah pak, menawi pati niku sampun wonten sing ngatur.

**HENI**

Ugo jodho to Mar?

**PAIDI**

Kabeh pancen wes diatur termasuk Siti ora bebojoan karo Sigit.

*Banjur Siti karo Aziz teko.*

**SITI**

Yowes pak, yen pancen bapak nglarang aku rabi karo Sigit mergo adat. Aku ijin rabi karo Aziz

**MBAH ATMO**

Lhah?

**SULASTRI**

Ti, kowe kui ngomong opo? Lha Aziz iku lak calone mbakyumu

**HENI**

Ora mbok, bapak yo ora setuju aku nikah karo Aziz. Makane yen bapak pancen jek percoyo karo adat mau. Lan aku karo Siti yo ora gelem dianggep anak durhaka. Aku wes sepakat yen Siti rabi karo Aziz. Aku rabi karo Sigit

**PAIDI**

Yo ora iso ngono. Bebojoan kok dinggo dolanan.

**SULASTRI**

Mbok yo uwes to pak

**SITI**

Lha ngopo pak? Dadi bapak ora ngrestui aku karo Sigit kui mergo adat opo mergo pengen njodohne aku karo mas Umar

**MBAH ATMO**

Yen kahanan wes koyo ngene aku ra melu-melu di

**HENI**

Mar, kowe kui lak ustad, opo yo pentes ngganggu hubungan mergo alesan adat?

**PAIDI**

Ora usah nyalahne Umar

**HENI**

Aku ora nyalahne Umar pak, aku mung takon

## **UMAR**

Nek menurutku, sakderenge ngapunten nggih pak, bu. Kula niki asline nggih tresna kalih Siti, ananging tresna niku mboten saged dipekso pak. Kula nggih sadar posisi kula niku dadosake masalah tambah runyam. Masalah adat, niku kula nggih sampun bola-bali matur ten simbah. Ngoten niku boten angsal dipun percoyo. Wonten Allah SWT ingkang luwih pantes dipercoyo. Babagan jodho, pati, rejeki, nasib iku sampun diatur dening Gusti kang maha welas. Dados wonten mriki mboten prayogi menawi kula nganggu pasangan ingkang ajeng sami-sami hamangubagyo.

*Desember, 2016*

**Contac Person Penulis**

0821 3885 2912

[Jokoyuliyanto38@gmail.com](mailto:Jokoyuliyanto38@gmail.com)

Sekretariat Teater Gadhang UNS Solo